

er die Natur/ vnd verursachet/ daß die Gifte hinter sich wieder zum Her-  
zen tritt/ vnd der Mensch sterben muß.

In specie aber vnd insonderheit von der Sache zureden/ ist zu wis-  
sen/ Daß

1. So Apostemen/ oder Blattern/ vmb den Kopff / oder hinter  
den Ohren/ Item vnter den Achsen/ das ist/ vnter den Armen/ oder  
auff der Brust/ entstünden/ soll man eine Ader am Arme/ (es sey wel-  
che es wolle/ laut voriger gegebener Ursache) oder auff der Handt /  
(davon/ wie auch kurz hiebevör gemeldet/ die Natur weniger ge-  
schwächt wird) schlagen.

2. So sich aber vnterhalb des Leibes/ vmb die Schoß / vnd darun-  
ter/ Zeichen erweisen/ soll man an den Füßen die Frawen / Rück /  
Brandt/ oder eine andere sichtbare Ader lassen / weil es dißfals auch  
nicht viel zubedeutet hat.

3. So zwey Apostemen/ vnd also auff jeder Seiten eines/ sich er-  
zeigen/ mag man an beyden Füßen die Adern öffnen / vnd nur halb  
so viel/ als sonst/ (so nehmlich nur an einem Fusse gelassen würde/)  
Blut heraus lauffen lassen.

### Particula III.

#### Vom Schröpfen insonderheit.

**E**s ist in fürhergegangener Particulâ Quæstione, 2. vermeldet  
worden / Welchen Personen die Aderlässe gar nicht dienlich.  
Weil aber durch das Blutlassen / besonders wann etwas von  
Zeichen sich vermercken laßt/ rath kan geschaffet werden / Als soll man  
die bey der Aderlässe angezogene General Regel dißfals auch für Aus-  
gen haben/ sond 1. so das Zeichen hinter den Ohren/ die Laßköpffe hin-  
ten an Hals / oder Nacken/ 2. So sie vnter den Achseln / auff die  
Schultern/ vnd 3. so sie inwendig bey der Schoß/ auff die Ballen des  
Hinders / vber die Knie/ oder auff die Ferßen/ ansetzen. Ludovi-  
cus Mercatus in seinem edlen Buche de Febris Malignis com-  
mendiret die Scarification an den Waden/ so ich zum öfftern ganz  
nützlich befunden/ Könnte in diesem fall auch gar fruchtbarlich adhibi-  
ret werden.

E

Con-